

長春真人西游記卷下

附錄

詔書

成吉思皇帝勅真人丘師省所奏應詔而未
 者備悉惟師道踰三子德重多方命臣奉厥
 玄纁馳傳訪諸滄海時與願適天不人違兩
 朝屢詔而弗行單使一邀而肯起謂朕天啓
 所以身歸不辭暴露於風霜自願跋涉於沙
 磧書章來上喜慰何言軍國之事非朕所期
 道德之心誠云可尚朕以彼酋不遜我伐用
 張軍旅試臨邊陲底定來從去背寔力率之
 故然久逸暫勞真心服而後已於是載揚威
 德略駐車徒重念雲軒既發於蓬萊鶴馭可
 遊於天竺達磨東邁元印法以傳心老氏西
 行或化胡而成道顧川途之雖闊瞻几杖以
 非遙爰咨來章可明朕意秋暑
 師比平安好指不多及

聖旨

成吉思皇帝聖旨通與諸處官員每
 丘神仙應有底修行底院舍等係逐日念誦
 經文告天底人每與

皇帝祝壽萬萬歲者所據大小差發稅賦都
 休教著者據丘神仙底應係出家門人等隨
 處院舍都教免了差發稅賦者其外詐推出
 家影占差發底人每告到官司治罪斷按主
 者奉到如此不得違錯須至給付照用者

右付 神仙門下收執

照使所據丘神仙係出家門人精嚴住持院
 子底人等並免差發稅賦准此

癸未羊兒年三月御實日

宣差阿里鮮面奉

成吉思皇帝聖旨丘神仙奏知來底公事是
 也懋好我前時已有聖旨文字與你來教你
 天下應有底出家善人都管著者好底反底
 丘神仙你就便理會只你識者奉到如此

癸未年九月二十四日

宣差都元帥質昌傳奉

成吉思皇帝聖旨丘神仙你春月行程別來
 至夏日路上炎熱艱難來沿路好底鋪馬得
 騎來麼路裏飲食廣多不少來麼你到宣德
 州等處官員好觀你來麼下頭百姓得來麼
 你身起心裏好麼我這裏常思量著神仙你
 我不曾忘了你你休忘了我者

癸未年十一月十五日

請疏三

燕京行尚書省石抹公

謹請

真人長春公任持天長觀者

竊以必有至人而後可以啓箇中機必有仙
 闕而後可以待方外士天長觀者人間紫府
 主上福田若非真仙人誰稱此道場地仰惟
 長春上人識超群品道悟長生舌根有花木
 香習襟無塵土氣寔人天之眼目乃世俗之
 津梁向也乘青牛而西邁不憚朝天今焉奉
 紫詔而南迴正當傳道幸無多讓早賜

光臨謹疏 癸未年八月 日

又

宣撫使御史大夫王

敦請

真人師父住持燕京十方大天長觀者

竊以應變神龍非蹄涔所能止無心野鶴亦何天不可飛故蒙莊出遊濠園增價陳搏歸隱雲臺生光不到若輩人難了如此事伏惟真人師父氣清而粹道大而高已書綺闕之名暫被玉壺之謫以千載為旦暮以八極為門庭振柱史之宗風提全真之法印昔也三朝之教主今茲萬乘之國師幾年應詔北行本擬措安於海內一旦迴轅南瀛可

能獨善於山東維太極之故宮寔大燕之宏構國家元辰之所在遠近取則之所先必欲立接人之基莫如宅首善之地敢輒伸於管見冀少駐於寬旌萬里雲披式副人天之望四方風動舉聞 道德之香謹疏

癸未年八月 日

又

燕京尚書省石林公

謹請

立神仙久住天長觀

竊以時止時行雖聖人不凝滯於物爰居爰處而君子有恒久之心於此兩端存乎大致長春真人重陽高弟四海重名為帝者之尊師亦天下之教父昔年應聘還自萬里尋思于今日接人久住十方天長觀上以祝皇王之聖壽下以薦生靈之福田頃因譏察於細人非敢動搖於仙仗不圖大老遂有遐心況京師者諸夏之本根而遠近取此手法則如或舍此而就彼是謂下喬而入幽輒敢堅留幸不易動休休莫莫無為深山窮谷之行永永長長而作太極瓊華之主謹疏

丙戌年八月 日

侍行門人

- 虛靜先生趙道堅 冲虛大師宋道安
- 清和大師尹志平 虛寂大師孫志堅
- 清貧道人夏志誠 清虛大師宋德方
- 葆光大師王志明 冲虛大師于志可

崇道大師張志素 通真大師鞠志圓

通玄大師李志常 願真大師鄭志修

玄真大師張志遠 悟真大師孟志德

清真大師慕志清 保真大師何志清

通玄大師楊志靜 冲和大師潘德冲

特旨蒙古四人從師護持

蒙古打 喝刺 八海

宣差 阿里 鮮

宣差 便宜使 劉 仲棟